

La seconda, 38 non sincere, 15 taia, 17 bona. Hozimo parlò missier Francesco Fileto dottor, avvocato del Querini. Li rispose Santo Barbarigo. Andò la parte: 4 non sincere, 31 taia, 35 bona. Et fo fatta bona.

Item, a l'Arsenal, reduti queste tre matine li proveditori et patroni con li X deputadi per il varar di la barza, manchò sier Tomà Mocenigo, et balotado 4 opinion, do non have niuna ballota; le altre do, *videlicet* una, di vararla in l'Arsenal et cavar et far un volto verso le Verzene, ave 7; l'altra, de romper el muro et vararla verso Muran ave 7. Et *iterum* poi disnar reduti tutti 15, fo balotà queste do parte una per mezo l'altra: 3 fo di vararla dentro, 12 de romper el muro, et questa fu presa.

Da poi disnar, fo Conseio di X con la Zonta, et prima stete el Conseio semplice più de hore do dentro. Preseno una parte, che sotto grandissime pene alcuni fazi lotho in questa città nè sotto el dominio, se non con parte presa in questo Conseio, posta per 6 Consieri, 3 Cai di X, et con i 5 sest de le ballote. *Item*, fo trovà le parte zerca el far de le comedie, et

Item, messeno una parte, zerca le monede non si toy lazi et li bancheti non fazino scrittura; la qual la matina fo publicata in Rialto.

Item, feno un cassier del Conseio di X, per mexi 4, sier Lazaro Mocenigo cao di X.

Da poi, con la Zonta, preseno una gràtia a uno Lorenzo veronese, benemerito del stado nostro, al qual fu concesso contestabile de la piazza de Verona, con ducati che poi la sua morte sia data a uno suo fiol.

386* *Da Bologna, di sier Gasparo Contarini orator, di . . .* Manda lettere de l'orator nostro in Franza. Et scrive come era certa differentia tra il re di Franza et l'imperador, *videlicet* che Cesare voleva 20 milia scudi per non haverli consegnà le terre de Puia. *Item*, scudi 100 milia per Et queste el papa l'ha adatade, che non li darà nulla, come Soa Santità li ha ditto. Ma la terza il re voria li fioli a Narbona, et Cesare li vol consignar a Baiona. *Item*, il re de Franza disse, non se acordando Cesare in li danari lassarà li fioli, et spenderà li danari in sguizari et se ritornerà a la guerra. *Item*, scrive come el Gran canzelier li ha ditto esser venuta la ratification del re Ferdinando, et de capitoli voleva non sarà altro, exceto se la Signoria vorà el capitolo de bandizadi, se metterà; et man-

dando la nostra ratification li darà quella del ditto re Ferando.

Di Franza, di sier Sebastian Justinian el cavalier orator, da Degiun, di 26 zener. Come era stato con il re, et monstratoli le nostre lettere de la paxe et liga fatta, Soa Maestà disse lo sapeva prima, et la Signoria ha fato ben a farla perchè non haria potuto star sola a la guerra; ma ridendo verso de lui disse: «Avè fatto anche liga dubitando che io non vegni a tuor el stado de Milan che a mi apartien; ma non importa; desidero aver una volta i mei fioli, et aspetava zonzesse monsignor de Prato per darli danari, qual è preparadi, et haverli.»

Da Ferrara, de sier Marcò Antonio Venier el dottor, orator. Come l'imperator havia mandato a chiamarlo che 'l dovesse andar a la sua incoronation, over mandarli soi fioli, etc.

A dì 10. La matina, el cardinal Cesarin, qual a di 8 da sera zonse in questa terra, insieme col cardinal Grimani, con poche persone, incognito alozato a la Zueca in casa del primocierio Barbarigo, hoi ditto Cesarin con el vescovo de Ceneda Grimani andono a veder el campaniel de San Marcò et le zoie.

Noto. Eri sera, per li zudexi de Piovegi, fo sentenziato sier Stefano Trivixan qu. sier Nicolò esser caduto a la leze, per haver dato ducati 4000 a usura a sier Marco Grimani, hessendo procurator, a raxon de 12 per 100; el qual Grimani querelò a li Piovegi. È stà sentenziato, anderà mò a la Quarantia.

Da poi disnar, fo Pregadi. Fo leta con grandissima credenza una *lettera da Costantinopoli, di sier Piero Zen baylo, di 20 decembrio*, più vecchia de le altre. Qual scrive

Fu posto, per li Consieri, poi leto una suplica di Hetor Orio armiraio de Candia, de darli licentia de poter venir in questa terra per mexi 6, per expedir alcune sue facende. Ave: 143, 20, 12. Fu presa.

Fu balotà sier Lorenzo da Mula de sier Agustin, tornato de soracomito, haver ben servito; et ave: 203, 16.

Copia de una lettera de sier Hironimo da chà da Pezaro capitano zeneral da mar, data in galia apresso Corfù, a dì 7 zener 1529. 387

Essendo passato de qui el schierazo, patron Piero Condulmer da Coron, cargò de zebibi a le Foie per conto de li Coresi, referisse haverli incontrato con una de le nave francese a Caò de Mania, atro-